



6. Radunanza cumünela dals 24.10.2018 a las 20.00 in sela polivalenta S-chanf

Presidi: Gian Fadri Largiadèr

Actuar: Gian Luca Vitalini

Preschaints: Preschaints sun 42 votantas e votants

Büro electorel: Lilian Godly, Maura Romero Duschletta

Tractandas:

1. Protocol da la radunanza cumünela dals 29 avuost 2018
2. Ledscha davart l'organisaziun e l'administraziun da l'ouvra electrica cumünela (ledscha OE)
3. Iniziativa – Controlla remuneraziuns e spaisas pajedas i'ls ultims desch ans als presidents cumünels
4. Cunvegna – Access rait da fibra locala traunter la vschinauncha politica S-chanf e sar Joos Simon Salzgeber
5. Cunvegna – Cumpra laina/ziplas traunter las vschinaunchas politicas S-chanf e Zuoz e sar Joos Simon Salzgeber
6. Varia

Our dal ravuogl da la radunanza vegn fat la proposta da na entrar süllas tractandas 4 e 5. Zieva cuorta discussiun sustegnan las votantas e'ls votants cun 20 cunter 8 vuschs la proposta da la suprastanza ed apruvscheschan la glista da tractandas sainza müdamaints.

Protocol: Il protocol da la radunanza cumünela dals 29 avuost 2018 vain approvo sainza cuntravusch.

21 0.110 Legislativa Ledscha davart l'organisaziun e l'administraziun da l'ouvra electrica cumünela (ledscha OE)

A la votaziun a l'urna dals 04 marz 2018 haun las votantas e'ls votants aderieu al concept da forz'electric 2020 e l'acceptaziun da la rait d'avent dals 01. october 2020 cun üna quota da vuscher d' 84%. Per pudair fer pü svelt pussibel las lavuors preparatoricas per üna fundaziun da l'OE, ho la suprastanza cumünela numno üna gruppa da lavur. Ils commembers da quista gruppa da lavur Curdin Barblan (presidi), Liun Quadri e Gianni

Largiadèr haun insembel cul giurist Fabrizio Visinoni e cul el.ind. Arthur Brüniger evaluo diversas fuormas giuridicas per üna fundaziun da l'OE S-chanf e propuonan da mner l'OE scu intrapraisa publica dependenta. A la votaziun a l'urna dals 23 settember 2018 haun las votantas e'ls votants aderieu a la revaisa parziela da la constituziun cumünela (art. 59 bis) cun üna quota da vuscher da 92% e s-chaffieu la basa per funder l'OE S-chanf. La suprastanza cumünela propuona a la radunanza cumünela d'aderir a la ledscha OE chi'd es gnida elavureda da la gruppa da lavur.

Proposta:

La suprastanza cumünela propuona d'approver la ledscha davart l'organisaziun e l'administraziun da l'ouvra cumünela (ledscha OE)

Discussiun:

La ledscha vain repassada artichel per artichel. Sar Fabrizio Visinoni e sar Arthur Brüniger daun sün dumandas respostas cumpetentas. Our dal ravuogl da la radunanza vegnan fattas diversas propostas.

Decisiun:

Seguaintas propostas vegnan aderidas da la radunanza cumünela:

Art. 15 Radunanza cumünela

La radunanza cumünela ho impustüt las seguaintas incumbenzas e cumpetenzas:

- a) Approver il preventiv ed il quint annuel da l'ouvra electrica;
- b) Decider davart affers speciels chi vegnan suottamiss da la suprastanza cumünela.
- c) *Tscherna dals commembers da la cumischiun administrativa tenor proposta da la suprastanza cumünela e/u in occasiun da la radunanza cumünela candidats propuonieurs;***
- d) *Dis-charg da la cumischiun administrativa.***
- e) *Stipulaziun dal reglamaint pels commembers da la cumischiun administrativa incl. lur indemnizaziun.***

Art. 16 Suprastanza cumünela

La suprastanza cumünela ho impustüt las seguaintas incumbenzas e cumpetenzas:

- a) Predeliberer il preventiv ed il quint annuel da l'ouvra electrica scu eir fer propostas a la radunanza cumünela;
- b) *Proposta a maun da la radunanza cumünela per la tscherna dals commembers da la cumischiun administrativa;***
- c) *Ingaschamaint dal gestiuneder zieva la tscherna tres la cumischiun administrativa e dal persunel ulteriur;***
- d) Decider davart expensas na büdschettedas e credits supplementers.
La cumpetenzas d'expensas as drizza tenor las disposiziuns illa constituziun cumünela;
- e) Decreter disposiziuns executivas tar quista ledscha, las cundiziuns d'affer generelas per la colliaziun, l'utilisaziun da la rait e la furniziun d'energia electrica scu eir reglamaints respectivs.
- f) Predeliberer tuot las tractandas e fer propostas in merit a la radunanza cumünela.

Art. 18 Cumischiun administrativa

¹La cumischiun administrativa as cumpuona da trais fin tschinch commembers.

²*Ün commember da la suprastanza cumünela ho da fer part illa cumischiun administrativa causa l'uffizi. Ils ulteriurs commembers da la cumischiun administrativa vegnan tschernieus tres la radunanza cumünela. La suprastanza cumünela ho da pisserer, cha tar la proposta da la tscherna da la cumischiun administrativa vain rapreschanto avuonda cumpetenzas professiunela.* La cumischiun

administrativa as constituescha dal rest sves. Il temp d'uffizi importa ün an; a nu do üngüna limitaziun dal temp d'uffizi.

Art. 20 Incumbenzas speielas da la cumischiun administrativa

La cumischiun administrativa ho impü las seguintas incumbenzas speielas:

1. Predeliberer tuot ils progets e fer propostas in merit a la suprastanza cumünela per mauns da la radunanza generela;
 2. Decider davart expensas na bütschettedas fin a fr. 50'000.— per cas singul, totelmaing però maximelmaing fr. 100'000.— per an, inclusivmaing credits supplementers;
 3. Approver reglamaints interns, directives e normas internas da la gestiun;
 4. Fixer las tariffas ed ils predschs per la colliaziun cun la rait, l'utilisaziun da la rait e la furniziun d'energia;
 5. Stipuler e modifier contrats da retrer electricited estra e contrats da concessiun (sainza concessiuns dal dret d'ova);
 6. Elavurer, predeliberer e fer propostas cur cha vegnan decretedas e modificadas las cundiziuns da gestiun generelas per l'access a la rait, l'utilisaziun da la rait e la furniziun d'energia electrica scu eir reglamaints respectivs per mauns da la suprastanza cumünela;
 7. Tscherner cumischiuns na permanentas subordinadas per la predeliberaziun da singulas tractandas. Las cumpetenzas da quistas cumischiuns subordinadas sun da circumscriber;
- 8. Tscherner il mainagestiun e'l substitut;**
9. Tscherner il proget, approver il proget, deliberer il credit e surder l'incumbenza in cas da progets da fabrica e d'acquiists;
 10. Decider davart activiteds da l'ouvra electrica our dadour il territori cumünel;
 11. Decider davart partecipaziuns e cooperaziuns i'l ram dal preventiv approvo;
 12. Stipuler mandats da prestaziun cun vschinaunchas provistas u cun terzas personas.

Art. 23 Indemnizaziun dals commembers da la cumischiun administrativa

¹L'indemnizaziun dals commembers da la cumischiun administrativa succeda confuorm al reglamaint fixo da la radunanza cumünela.

²Sforzs extraordinaris dals commembers paun gnir indemnisos speielmaing tres decisiun da la cumischiun administrativa.

La radunanza cumünela aderischa a la ledscha davart l'organisaziun e l'administraziun da l'ouvra electrica cumünela (ledscha OE) cun ils müdamaints manzunos.

22 0.111 Radunanza cumünela

**Iniziativa – Controlla remuneraziuns e spaisas pajedas i'ls ultims
desch ans als presidents cumünels**

Ils 19 marz 2018 haun 29 personas inoltro ün'iniziativa cun la seguinta formulaziun:

As basand sün art. 19 dals tschantamaints cumünels da la vschinauncha da S-chanf pretendan ils suotsegnos, ch'ün giurist la lingua rumauntscha controlla insembel cun la cumischiun da gestiun, scha las remuneraziuns e spaisas pajedas i'ls ultims desch ans als presidents cumünels correspuondan a l'uorden da salarisaziun per ufficiants, impiegos e lavuraints cumünels e vschinels da la vschinauncha da S-chanf, approvo da la radunanza cumünela dals 25 october 2007. Eventuelas irregulariteds dessan gnir comentadas e quantifichedas in ün rapport a maun da la radunanza cumünela:

A basa dal cuntgnieu da la dumanda d'iniziativa ho il president cumünel piglio s-chüsa per quista tractanda. Confuorm a l'examinaziun correspundenta es l'iniziativa gnida suottascritta valablamaing da 28 votantas e votants. Üna persuna nu figürescha i'l register dals votants. Cun que es raggiunta la quantited d'iniziants pretaisa confuorm a l'art. 20 da la constituziun cumünela. Scu prüms 5 suotsegnos i'l sen da l'art. 1 da la constituziun cumünela velan Jon Peider Lemm, Gian Andrea Bott, Simon Caratsch, Vito Schorta e

Claudia Massimo. Materiemaing pretenda l'iniziativa ch'ün specialist examinescha insemel cun la cumischiun da gestiun ils salaris e las spaisas chi sun gnidas pajedas als presidents cumünels düraunt ils ultims 10 ans in que chi riguarda lur confuormited leghela e comunichescha il resultat da quist'examinaziun a la radunanza cumünela. Confuorm a la constituziun ho la cumischiun da gestiun l'incumbenza d'examiner las fatschendas da la suprastanza cumünela e da rapporter ils resultats da si'examinaziun a la radunanza cumünela; ella ho ün dret da proposta (cf. art. 53 constituziun cumünela). Ella po consulter a persunas privatas per l'examinaziun. L'iniziativa nu violescha üngün dret surordino, ma pretenda qualchosa chi cumpetescha a la cumischiun da gestiun tres la constituziun. L'iniziativa es perque valabla.

Proposta:

La suprastanza cumünela propuona l'acceptaziun da l'iniziativa dals 19 marz 2018.

Decisiun:

Zieva diversas dumandas e objecziuns ho la radunanza cumünela decis cun granda magiurited e duos absteziuns d'aderir l'acceptaziun da l'iniziativa dals 19 marz 2018. Cotres survegn la cumischiun da gestiun l'incumbenza da piglier sü las lavuors cun ün giurist da lingua rumauntscha e da rapporter lur examinaziun in üna da las proschas radunanzas cumünelas.

23 0.209 Contrats e cunvegnas Cunvegna – Access rait da fibra locala traunter la vschinauncha politica S-chanf e sar Joos Simon Salzgeber

Cun la cunvegna preschainta reglan ils partieus l'installaziun da la rait da comunicaziun LWL cumünela i'l büschen da protecziun da cabels da la rait dal s-chudamaint a distanza da Joos Simon Salzgeber e da fer adöver da tel sül territori cumünel da S-chanf e la lingia fin a Suotarivas (Zuoz).

Proposta:

La suprastanza cumünela propuona d'approver la cunvegna - Access rait da fibra locala traunter la vschinauncha politica S-chanf e sar Joos Simon Salzgeber

Decisiun:

Zieva animeda discussiun, decida la radunanza cumünela d'adeirir a la cunvegna traunter la vschianuncha politica da S-chanf e sar Joos Simon Salzgeber per l'access da la rait da fibra cun granda magiuranza. Il president spiega ils puncts ils pü importants i'l contrat e explicha, cha la vschinauncha ho da fer expensas d'üna vouta da ca. fr 15'000.00 per realiser ün'attach da chesa d'LWL minimal per las ca. 15 chesas chi nu haun üngün attach reguler. Il fit pels büschens tar la Repower gniss a custair la vschinauncha ca. fr. 4'000.00 l'an.

24 0.209 Contrats e cunvegnas Cunvegna – Cumpra laina/ziplas traunter las vschinaunchas politicas S-chanf e Zuoz e sar Joos Simon Salzgeber

Cun la cunvegna preschainta reglan ils partieus la cumpra da laina/ziplas da sar Joos Simon Salzgeber per sieu s-chudamaint a distanza e las vschinaunchas da S-chanf e Zuoz. Il depüto infurmescha sur ils predschs da ziplas.

Proposta:

La supranstanza cumünela propuona d'appruver la cunvegna – Cumpra laina/ziplas traunter las vschinaunchas politicas S-chanf e Zuoz e sar Joos Simon Salzgeber.

Decisiun:

Zieva animeda discussiun es gnida fatta üna cuntraproposta, chi prevezza üna düreda dal contrat da 5 ans e na scu previs da 20 ans. Quista cuntraproposta vegn sbüttada cun 17 cunter 16 vuschs. Impü vegn fat la proposta d'ün votant cha la cunvegna vela pür davent dals 01. schner 2019 invezza davent dals 01. schner 2018. Quist müdamaint vain piglio sü.

25 9.999 Varia

Il president spiega cuort davart il principi public e scu cha l'agir da la supranstanza cumünela es in futur. La supranstanza cumünela ho decis chi vain publicho il protocol da la supranstanza in fuorma d'ün protocol da decisiun d'avent dal mais novemeber 2018.

Ün votant dumanda perchè cha fin in uossa nun es pü gnieu tractando la cunvegna da la lingia d'ova traunter S-chanf e Zuoz. Il president spiega cha la supranstanza cumünela spetta sün la finischiun dal QS da l'ova. Quista lavur chi vain fatta dal indschegner Martin Gini cuntegna la valur actuela da la rait d'ova. Per l'elavuraziun dals adaptamaints giavüschos i'l contrat sun quistas datas indispensablas.

Ün oter votant fo üna dumanda pervi dals cuosts da la lingia d'ova traunter S-chanf e Zuoz e dumanda in che radunanza cumünela chi'd es gnieu fat bun il credit per fabricher la tela lingia e cha quels cuosts sejan bger memma grands. Il president spiega cuort la situaziun e cha'ls cuosts per quist fabricat vegnan spartieus sü a listessa part per S-chanf scu eir per Zuoz. Roman Parli il depüto respunsabel surpiglia il pled e spiega, cha'ls cuosts previs per quista lingia d'ova sun per mincha vschinauncha fr. 250'000.00 e d'eiran i'l plan d'investiziun 2018. Pel mumaint sun ils cuosts per las duos vschinaunchas previs sün fr. 280'000.00.

Ün votant fo auncha la remarcha, cha la supranstanza cumünela vaiva da sclarir giò chi chi surpiglia ils cuosts regard la lingia da l'ova persa sül terrain da la Bos-chetta Plauna. Il president spiega chi's es pel mumaint in discuors regard quista fatschenda cun la supranstanza administrativa da la Bos-chetta Plauna SA. La Bos-chetta Plauna SA ho da sancziuner l'import tres ils acziunaris.

Il president serra la radunanza a las 22.25 ed ingrazcha a tuot ils preschaints per lur cumparsa.

In buna fè

Il president:

L'actuar:

G. Largiadèr

G. L. Vitalini